

† EKALESIA FAAPOTOPOTOGA KERISIANO I AMERIKA SAMOA †

TUSI AOGA ASO SA



Ianuari - Iuni

2026



VASEGA AMATA II

Saunia ; Ofisa o A'oa'oga Kerisiano

† EKALESIA FAAPOTOPOTOGA KERISIANO I AMERIKA SAMOA †

TUSI AOGA ASO SA



Ianuari - Iuni  
2026



VASEGA AMATA II

Saunia ; Ofisa o A'oa'oga Kerisiano

**FAASOLOGA MATAUPU  
VASEGA AMATA 2 (TAUSAGA 5-7)  
FEPUARI — IUNI 2026**

<u>ASO/MASINA</u>	<u>MATAUPU</u>	<u>TUSIFAITAU</u>
1. Fepuari 01, 2026	Tala i le Faato'aga i Etena (Vaega 1)	Kenese 1: 27-31
2. Fepuari 08, 2026	Faato'aga i Etena (Vaega 2)	Kenese 2: 16-20
3. Fepuari 15, 2026	Faato'aga i Etena (Vaega 3)	Kenese 2: 21-25
4. Fepuari 22, 2026	Mataupu Faamanatu o Fepuari	-----
5. Mati 01, 2026	O le tala ia Noa (Vaega 1)	Kenese 6: 9-14
6. Mati 08, 2026	Tala ia Noa (Vaega 2)	Kenese 6: 17-22
7. Mati 15, 2026	Tala ia Noa (Vaega 3)	Kenese 7: 17-24
8. Mati 22, 2026	Tala ia Noa (Vaega 4)	Kenese 8: 15-20
9. Mati 29, 2026	Mataupu Faamanatu o Mati	-----
10. Aperila 05, 2026	Ua toe tu le Alii ( Aso Sa Eseta)	Luka 24: 1-11
11. Aperila 12, 2026	Tofiaina Matatia e fai ma So'o	Galuega 1: 23-26
12. Aperila 19, 2026	Faatuatua e maua ai le ola faavavau	Ioane 3: 16-21
13. Aperila 26, 2026	Mataupu Faamanatu o Aperila	-----
14. Me 03, 2026	O le Alofa Fa'a-Tinā (Iokapeta ma Mose)	Esoto 2: 1-6
15. Me 10, 2026	Hana ma Samuelu	1 Samuelu 1: 24-28
16. Me 17, 2026	Elia ma le Fafine Sarefata	1 Tupu 17: 8-16
17. Me 24, 2026	Tinā o le Penetekoso	Galuega 1:12-14 Galuega 2: 1-4
18. Me 31, 2026	Mataupu Faamanatu o Me	-----
19. Iuni 07, 2026	O le Vaeluaina o le Sami	Esoto 14: 15-22
20. Iuni 14, 2026	O Tulafono a le Atua (Vaega 1)	Esoto 20: 3-7
21. Iuni 21, 2026	O Tulafono a le Atua (Vaega 2)	Esoto 20: 8-13
22. Iuni 28, 2026	Mataupu Faamanatu o Iuni	-----

**ASO SA: FEPUARI 01, 2026**

**MATAUPU 01: TALA I LE FA'ATO'AGA I ETENA (VAEGA 1)**

**TUSI FAITAU: KENESE 1: 27-31**

**SINI:** Ia a'oa'oina le fanau ma malamalama i nisi o vaega o le tala o le faato'aga i Etena. Ia iloa e fanau lona si'osi'omaga, o galuega mamana o le Fofoaga a le Atua.

### **FESOASOANI MO FAIAOGA**

E fa'atalofa atu lau susuga le faia'oga. Talitonu ua maua se fa'asiliga malosi i le alofa tausii mai o lo tatou Atua. Ua aulia ma amatalia galuega faagasolo a le ekalesia e ala i le a'oga Aso Sa i lenei tausaga. O le a ta'oto ia le tala o le Fofoaga i lona lautelega, ae fia faatāua nisi o vaega o i totonu o le faato'aga i Etena, o le si'osi'omaga lava lea o loo tatou soifua ma ola ai.

### **FESOASOANI MO LE MATAUPU**

1. Amata le vasega i se tatalo, faafeiloa'i le fanau, soso'o ane ai ma se pese.
  - a. O lima galue ma vae momo'e, meaalofa le Atua mo a'u ma oe.
2. Taoto atu lava le faitauina o le Tusi Paia i lau susuga ina ia malamalama atili le tala.
3. O se fesoasoani faatupu lagona ma manatu mo le a'oa'oina o le fanau.
  - a. Ua ma'oti lava le tala o le fofoaga pei ona iai le mataupu atoa. A o le taumafai e tā-aofa'i lenei tala, e faatāua ai nisi o vaega o loo i totonu o le si'osi'omaga o le faato'aga i Etena. Tulaga uma nei o loo va'aia e tagata ma molimauina e fanau i aso fai so'o. A o le autu o lenei mataupu, ia malamalama le fanau, o ia ma lona si'osi'omaga o vaega uma o le fa'atoaga i Etena.
  - e. I aso anamua, sa iai se faato'aga matagofie i totonu o Etena. Na faia e le Atua lenei faato'aga mo le ulua'i tagata o le lalolagi. Na fausia e le Atua mea matagofie uma lava. O le La, Masina ma Fetu, o le Sami ma Vaitafe, o La'au ma Fugāla'au, o I'a ma figota o le sami, o Manu felele ma Manu vaefa, ma mea fetolofi uma i le eleele. Na faia e le Atua mea uma nei i aso e 6 ma tuu iai le ola, faapea ai ma le ulua'i tagata, ua igoa ia Atamu.

### **A'OA'OGA**

1. O le si'osi'omaga ma le tagata na faia e le Atua.
2. O le si'osi'omaga na tuu iai e le Atua le pule i le tagata e tausii ma fa'apelepele.
3. A'oa'o le fanau, ia taofi le faatama'ia ma le faalapisii i le si'osi'omaga.
4. Faatasi ai ma nisi o a'oa'oga ua silafia e lau susuga.

### **GALUEGA FAATINO**

1. Lenā ua tuuina atu nisi o ata e faailoa/faaali atu i le fanau.
2. Aga'i i fafo i le lotoā, e matamata i le si'osi'omaga, e faamautū atili ai le mataupu.
3. Pese ma Taaga: My God is so big, so strong and so mighty there's nothing my God cannot do.



**GALUEGA FAATINO:** Tusiga Ata

Manaia ae saunia e lau susuga ni pepa ma ni peni vali (crayons) mo tusiga ata a le fanau. Tusi se ata o se la’au poo se fuala’au aina (fruit/vegetable) e fialia ai. Pe tusi foi se ata o se mea ola e fialia ai poo sana fanafao, faatasi ai ma le igoa o le manu.

**A’OA’OGA**

1. Faalogo ma Usita’i
2. Talia ma le faafetai le faasoa a le Atua e ala i lana foafoaga.
3. Tausi, puipui, ma leoleo le si’osi’omaga.

**PESE:** Faalogo ma usita’i e leai se isi ala, e fialia le Atua pe a faalogo ma usita’i.

**\*\*\*\*\*MANUIA LE SAPATI\*\*\*\*\***



**ASO SA: FEPUARI 15, 2026**

**MATAUPU 03: TALA I LE FA’ATO’AGA I ETENA (VAEGA 3)**

**TUSI FAITAU: KENESE 2: 21-25**

**SINI:** Ia malamalama le fanau i le fausiaina o Eva, ma le agasala muamua o le tagata ona o le lē usita’i.

**FESOASOANI MO FAIAOGA**

Malo le onosa’i, malo le faamalosi i le soifua valaauina. O le vaega mulimuli lenei o le faagasologa o le tala i le faatoaga i Etena. Tuu atu lava i lau susuga le faitauina o le Tusi Paia ma nisi o su’esu’ega e tapena ai le lesona. Taumafai lava se auala e tuu faatasi ai le tala mo le mataupu a fanau. Manuia lau tapenaga, manuia le galuega.

**FESOASOANI MO LE MATAUPU**

Ua aulelei ma matagofie le faato’aga pei ona tuu iai e le Atua o la’au ma fugala’au eseese, faapea foi i manu ma mea ola eseese. Fetalai foi le Alii ia Atamu ia tausī ma puipui, aemaise le la’au e iloa ai le lelei ma le leaga, ia aua nei ‘ai ai. Na fealualua’i le Agaga o le Alii i le faato’aga ma talatalanoa ia Atamu. Ona finagalo lea o le Atua, e tatau ona iai se isi tagata e to’alua ma Atamu. Lea na faamoegaseina ai loa Atamu, ae toina lona ivi ‘aso’aso ma fausia ai Eva. I totonu o le faato’aga i Etena sa iai se gata. Ua foliga o se gata, a o Satani o loo tino mai i le gata. Na ia faaosooso Eva e ‘ai le la’au na faasāina, auā e le oti ai, ae na te iloa mea uma ua silafia e le Alii. Ona ‘aina lea e Eva o le fua o le la’au, ma faaoso ia Atamu e tofo. Na manatuaaina e Atamu le faatonuga a le Alii. Ua iloa e Atamu e le o afaina pe oti Eva ina ua ‘ai i le fua o le la’au na faasaina. Na tosina le loto o Atamu i le tau faaosooso a Eva, lea na i’u ai lava na ‘ai. Ua le usita’i Atamu i le faatonuga a le Atua. Na faasalaina e le Atua Atamu, Eva, ma le gata ona o le lē usita’i ma le tau faaosooso.

**GALUEGA FAATINO:** Fesili ma Tali

Taoto atu lava le faiga o fesili e te iloa e tala feagai mo fanau. Manai foi ae faamalamalama i le vasega uiga o igoa o Atamu ma Eva. A o nai fesili ia, e fesoasoani i lau galuega.

1. Faafefea na fausia Eva? (Ivi asoaso o Atamu)
2. Poo le a le gata, poo ai? (Satani)
3. Le a le mafuaaga na agasala/faasalaina ai ulua’i tagata? (Le usita’i / Ua ‘ai le fua o le la’au na Faasaina.



**ASO SA: MATI 01, 2026**

**MATAUPU 04: O LE TALA IA NOA (VAEGA 1)**

**TUSI FAITAU: KENESE 6: 9-14**

**SINI:** Ia iloa ma malamalama le fanau i tala'aga o Noa ma le mafuaaga na valaauina ai e fau le Va'a.

**FESOASOANI MO FAIAOGA**

Ua tatou aulia manuia lenei masina fou i le agalelei o le Atua, talitonu o loo manuia lau susuga i lona alofa. O le a taumafai pea e tu'u fa'asolo lenei tala mai lona amataga, pei ona iai le lesona o lenei taeao. Fa'aauau pea e lau susuga le faitauina o le Tusi Paia mo lau tapenaga. Manaia foi ae faitau atoa le mataupu e 6, ina ia malamalama atili le tala e fesoasoani i lau galuega.

**FESOASOANI MO LE MATAUPU**

Ina ua mavae le vaitau o Atamu ma Eva, na faato'ateleina e le Atua le lalolagi. Ua tupu ma olaola le tele o tagata. Le mea ua tupu ua malosi le agasala. Ua silafia e le Atua le leaga ma le sauā o tagata, ma finagalo ai loa o le a soloiaeseina uma le lalolagi i le Lolo. Peita'i o Noa, ua alofagia e le Alii ona o le tagata e amiotonu ma usita'i. Fetalai le Atua ia Noa ia faia se vaa, e faasaoina ai ia ma lona aiga. O le faamaoni ma le usita'i o Noa i le Alii, na laveaiina ai lona aiga faapea ona atalii o Semu, Hamo, ma Iafeta i le alofa o le Atua.

**GALUEGA FAATINO: FESILI MA TALI**

1. Aisea na faanoanoa ai le Atua? (Malosi le leaga, lē usitai, faasauā o tagata)
2. Aisea na valaau ai le Atua ia Noa e fau le vaa? (Ua agasal le lalolagi)
3. O ai igoa le fanau a Noa? (Semu, Hamo, Iafeta)

\*\*\* Ma nisi fesili te finagalo ai.

**A'OA'OGA**

1. E le fiasia le Atua i le tamaititi fa'alologatā ma le lē usita'i.
2. Taofi le faasauā, e faanoanoa ai Iesu (Stop bullying).

\*\*\* Ma nisi a'oa'oga talafeagai ua e manatu ai.

**PESE:** I le lalolagi atoa, o loo galue le Agaga o le Atua.

\*\*\*\*\***MANUIA LE SAPATI**\*\*\*\*\*

\*\*\*\*\*

**ASO SA: MATI 08, 2026**

**MATAUPU 05: O LE TALA IA NOA (VAEGA 2)**

**TUSI FAITAU: KENESE 6: 17-22**

**SINI:** Ia malamalama le vasega i mea uma na finagalo le Atua e ave i totonu o le vaa.

**FESOASOANI MO FAIAOGA**

Soifua manuia i le alofa tausii o le Alii. Malo le tauata'i i galuega faagasolo a le Ekalesia aoao. Taoto pea i lau susuga le faitauina o le tusi faitau, faatasi ma nisi o su'esu'ega e fesoasoani i lau tapenaga. Manaia ae amata le lesona i le toe faamanatu o le mataupu o le aso Sa ua tuana'i. Ae o le a taumafai pea e ootoo ma tuu faatasi se vaega e fa'aauau ai le tala ia Noa.

**FESOASOANI MO LE MATAUPU**

Ua mae'a ona fasuia o le vaa, ona fetalai lea o le Atua ia Noa, e tapena lona aiga e ulufale i le vaa. O Noa ma lona to'alua, o ona atalii e to'atolu ma o latou avā, ua sauni uma e ulufale i le vaa. Le gata i lea, fetalai foi le Atua ia ave i le vaa mea ola ia ta'ilua i mea uma. Ia tasi le manu po'a tasi le manu fafine, ua finagalo le Alii ia

faaolaina faatasi ma Noa ma lona aiga i le taimi o le Lolo. Na tapenaina foi e Noa o mea'ai e tele mo ia ma lona aiga, faatasi ma mea ola uma. Mea uma lava sa poloa'i le Atua ia Noa ia faia, sa faapea lava ona usita'ia e Noa ma faatino.

**GALUEGA FAATINO:** Pese "O ai na fau le Vaa"

A'oa'o ma toe faamanatu i le fanau upu o lenei pese, ina ia iloa ma malamalama i ituaiga o manu poo mea ola na finagalo le Atua e ave i le vaa, faatasi ai ma Noa ma lona aiga.

O ai na fau le va'a ×2 O Noa ×2 O ai na fau le vaa? O Noa na fau le vaa

Ua o mai nei o manu ta'i lua

O povi asini ma solofanua

O ai na fau le vaa? O Noa na fau le vaa

Ua o mai nei o manu ta'i fa

O manu pepeti ma lapopo'a

O ai na fau le vaa? O Noa na fau le vaa

Ua o mai nei o manu ta'i ono

O manu fetolofi ma manu osooso

O ai na fau le vaa? O Noa na fau le vaa

Ua o mai nei o manu ta'i valu

O manu etoeto ma manu lamulamu

O ai na fau le vaa? O Noa na fau le vaa

Ua o mai nei o manu ta'i sefulu

O manu uumi ma manu pupu'u

O ai na fau le vaa? O Noa na fau le vaa

Savali mai Noa ma tu i le faamalama


Ma talotalo atu i le motu o tagata

O ai na fau le vaa? O Noa na fau le vaa.

**A'OA'OGA**

1. E tapena e le Atua manuia mo le tagata.
2. E faaola e le Atua i tatou pe a faalogo ma usita'i.
3. Faalogo ma usita'i i matua.

\*\*\*\*\*MANUIA LE SAPATI\*\*\*\*\*



**ASO SA: MATI 15, 2026**

**MATAUPU 06: O LE TALA IA NOA (VAEGA 3)**

**TUSI FAITAU: KENESE 7: 17-24**

**SINI:** Ia malamalama tamaiti i le taimi na ufitia ai le lalolagi e le Lolo.

**FESOASOANI MO FAIAOGA**

Malo galulue, malo le onosa'i i le soifua valaauina mo le a'oga aso Sa. O loo fa'agasolo pea le tala ia Noa i ona vaega, auā le fa'aauuina o le mataupu mo a'oa'oga a le fanau. E taua lava le amata o lau lesona lenei aso i le faamanatu o le mataupu ua tuana'i. Ma le naunauta'iga, ia solosolo lemu ma feso'ota'i lelei tulaga o le tala i


lona faamatalaina. Tuu atu lava i lau susuga le tusi faitau, aemaise nisi o au sa'iliga mo lau lesona. Manuia tele galuega a feagai ai!

### **FESOASOANI MO LE MATAUPU**

Ua ulufale Noa ma lona aiga, faapea mea ola uma na filifilia, ona tapunia lea e le Atua o le faitoto'a o le vaa. Ua tō le timu tele i aso e 40 ma ua ufitia ai le lalolagi uma. Ua fa'aumatia ai ola o tagata lē usita'i (agasala), ma mea ola uma o loo iai. O la'au, ma mauga, ma le lalolagi uma, ua lofia e le vai. Ua faaumatia e le Atua le lalolagi atoa i le Lolo. Peitai o Noa ma lona aiga, ma mea ola uma o i totonu o le vaa sa faasaoina. Ua mavae aso e 40, ua fa'aagi e le Atua le savili ma le matagi i le lalolagi, ona punitia lea o punāvai o le moana ma taofia le timu mai le lagi. Ua mātū ma mau le vai na ufitia ai le lalolagi, ua pa'ulia (landed) foi le vaa i le tumutumu mauga.

### **GALUEGA FAATINO: VALIVALIGA ATA**

Manaia ae fai se kopi o le ata o loo i le tusi / pe saunia lava e lau susuga se ata e talafeagai e faatatau i le tala sa faamatalaina. O le ata o Noa ma le vaa, ona tufatufa lea i le vasega e vali lava le ata a le tama poo le teine, e toe ao pe a mae'a le vasega.



### **A'OA'OGA**

1. Ua faasaoina e le Atua Noa ma lona aiga mai le Lolo.
2. E alofa le Atua i le tagata faamaoni.
3. O le alofa i le Atua, e faaolaina ai tatou mai faigata.

**PESE:** Le Alofa o le Atua e Ofoofogia!

\*\*\*\*\***MANUIA LE SAPATI**\*\*\*\*\*

**ASO SA: MATI 22, 2026**

**MATAUPU 07: O LE TALA IA NOA (VAEGA 4)**

**TUSI FAITAU: KENESE 8: 15-20**

**SINI:** Ia malamalama le fanau i le ulufafo manuia o Noa ma lona aiga, ma mea ola uma na iai le vaa, e afua i le alofa tausii o le Atua.

### **FESOASOANI MO FAIAOGA**

Momoli le agaga faafetai i lau susuga e tusa ai ma galuega fa'agasolo mo le fanau. O le vaega mulimuli leni o le tala ia Noa. Taumafai pea e lalaga faatasi leni tala ina ia fa'afaigofie le so'otaga o mataupu a le fanau. Faamoemoe lava i lau faitauga o le tusi, faatasi ai ma nisi o su'esu'ega, aemaise lesona ua tuana'i, e fesoasoani i lau tapenaga.

### **FESOASOANI MO LE MATAUPU**

Ina ua foi mai le lupe ma le lau olive mata, o iina na iloa ai e Noa ua matūtū le vai, ua leai se Lolo. Ina ua mavae atu le lolo, ona fetalai atu lea o le Atua ia Noa, "Ina ulufafo ia i le vaa, o oe, ma lau ava ma ou atalii, faatasi ma oe". Ona o mai ai lea i fafo o Noa ma lona aiga faatasi ai ma manu. O le fetalai lea a le Atua ia Noa, ina ia tutupu ma ia uluola le lalolagi. O lona uiga ia fanafanau Noa ma lana fanau faapea foi i manu eseese uma. O manu vaefa fanua, o manu fetolofi, o manu lele o meaolafa uma ina ia faatuputeleina ai le lalolagi. Ua latou ulufafo ma le vaa, ua taitasi lava ma lona ituaiga. Ona ulufafo lea o Noa ma lana fanau, ua latou fai le taulaga mu, o le taulaga faafetai i le Atua, ina ua faasaoina i latou mai le lolo. O le fai o le taulaga, o le loto faafetai o le viiga i le Atua ona o lona alofa ma lona agalelei. Ona tuuina lea e le Atua o le nuanua (rainbow), o le faailoga o lana feagaiga, e le toe oo se Lolo i le lalolagi.



**GALUEGA FAATINO: UIGA O UPU**



mea na o latou vaai ai, le faaaliga mai agelu, ua toetu Iesu. O le Talalelei lenā i le manumalo o lo tatou Alii o Iesu, ua logologoā ai tulu'iga uma o le lalolagi.

### **GALUEGA FAATINO: UIGA O UPU**

1. vaisapati – uluai aso o le vaiaso, taeao o le Aso Sa ii)
2. tafa o ata – taimi o le taeao, ua amata ona mou ese atu le pogisa, ae fotua'i mai le malamalama
3. fulieseina – tulei ese, aveese i
4. fememea'i – le mautonu, popole, fefefe
5. ofu pupula – faatusa i ofu o agelu, ua sinasina mai, poo ua susulu mai lona malamalama
6. e le o iinei o ia; a ua tu – faatusa i se tagata sa taoto; a ua tula'i. O loo faatatau ia Iesu ua toetu mai le oti.

### **A'OA'OGA**

1. Ua manumalo Iesu Keriso i le oti ma le tuugamau.
2. Ua tapenaina ma saunia e Iesu le ala mo tagata faatuatua uma.

**PESE:** Jesus is the winner man / O Iesu o le manumalo

\*\*\*\*\***MANUIA LE ESETA**\*\*\*\*\*



**ASO SA: APERILA 12, 2026**

**MATAUPU 09: O LE TOFIAINA O MATATIA E FAI MA SOO**

**TUSI FAITAU:** Galuega 1: 23-26

**SINI:** Ia malamalama le fanau, e filifilia e le Atua i tatou e faia lona finagalo ma tala'i le Talalelei.

### **FESOASOANI MO FAIAOGA**

Malo le soifua manuia i lau susuga, malo foi le galulue i faiva ua valaauina ai. Ua tuana'i atu le Eseta ma le toe tu sa faamanatuina. Peitai, e fia tuliloaina pea le autu o le toe tu, ia fesootai ma le tofiaina o Matatia. Auā o le Talalelei, ua aofia ai soo se kerisiano e avea ma molimau, o le manu lautī o lo tatou fa'atuatuga.

### **FESOASOANI MO LE MATAUPU**

Ua mae'a le maliu ma le toe tu mai o Iesu, ua afio a'e o Ia i luga le lagi, ae auina ifo lona Agaga Paia ma tauto'alua ai lona 'au so'o e o e tala'i le Tala Lelei. O le taimi tonu lea, ua toe sefulu ma le tasi so'o o Iesu ina ua oti Iuta le faalata. Manatu ai loa Peteru ma le au so'o ua tatau ona saili se tasi e sui ia Iuta, ina ia faaatoa ai le fauainumera e 12 o le au soo o Iesu. Molimau a le Tusi o Galuega, o le tagata e avea ma so'o, o se tagata sa molimau i le toetu ma le maliu o Iesu. O lona uiga, o le tagata ua na ia taliaina Iesu i lona olaga mai lava i le taimi na papatiso ai e Ioane. O le ala lea na filifili ai loa Matatia ma Iosefa, poo ai o laua e suitulaga ia Iuta. Ua latou fai le vili poo ai o le a avea ma so'o. O nisi ia o auala sa faaaogaina i le Feagaiga Fou faapena foi i le Feagaiga Tuai, e fai ai a latou filifiliga ma sailiiliga. O lea na faia ai loa le vili e le au soo, faatasi ma la latou tatalo i le Atua o ia e silafia mea uma, o le Atua e filifilia le tagata mo lana feau. Na faasaga le vili ia Matatia, ma tofia ai loa o ia e fai ma soo. Ua tofia Matatia e na te faaauuina le galuega, e fai ma molimau e tala'i le Talalelei ma le finagalo o le Atua. O lona uiga e tofia foi tatou e le Atua e ala i so'o se valaauina, e faatino lona finagalo.

### **GALUEGA FAATINO: FESILI / TALI**

1. Le a le uiga o le upu "So'o"?

Tali: O lē mulimuli ia Iesu / Molimau i le Talalelei

2. O le a le Talalelei?

Tali: O le toe tu manumalo o Iesu maile oti

3. Toa fia 'au so'o a Iesu?

Tali: 12

4. O ai le so'o na suia'i ia Iuta le Faalata?

Tali: O Matatia

### **A'OA'OGA**

1. Ia avea i tatou uma ma so'o e molimau i le alofa o Iesu.
2. E fa'aaogaina e le Atua i tatou e faia lona finagalo.
3. O le Atua e tofia i tatou e fai lana galuega.

**PESE:** Ua ou filifili, e mulimuli ia Iesu / I have decided to follow Jesus

\*\*\*\*\*

### **ASO SA: APERILA 19, 2026**

### **MATAUPU 10: O LE FAATUATUA I LE ATUA, E MAUA AI LE OLA FAAVAVAU**

**TUSI FAITAU:** Ioane 3: 16-21

**SINI:** Ia a'oa'oina le fanau le mafuaaga na maliu ma toe tu manumalo ai Iesu. O le Afio mai o Iesu i le lalolagi, e faafouina le tagata ma lavea'i mai le pouliuli o le agasala.

### **FESOASOANI MO FAIAOGA**

Malo le soifua manuia i lau susuga, faafetai mo galuega faatino o aso Sa ta'itasi. O le Ioane 3:16, o le autu aoao lea o loo taula'i iai tusitusiga a le 'au Evagelia. Le alofa o le Atua e le maluelue pe faapito i se tagata, ae 'aapa atu ma lavea'i mai. Le ata o le alofa moni lea ua fa'ataoto lona faavae e ala ia Iesu.

### **FESOASOANI MO LE MATAUPU**

Afai ua alofa mai le Atua i le lalolagi ma i tatou uma, e tatau foi e le tagata ona alofa i le Alii. Ua tuana'i atu tala o le toe tu, ma le valaauina o Matatia e avea ma so'o e molimau. A o le mataupu leni, e a'oa'o ai le fanau i le ola tala atu o le oti. O le manuia e faavavau e maua e le tagata e faatuatua ma talitonu faamaoni ia Iesu. Le galuega faaola a Iesu na ui i ala faigata, ma faavaeina ai le ata o le alofa moni. Le alofa na fa'atoilalo ai le oti, le alofa tu'u avanoa foi lena mo le tagata ia salamō ma liliu i le Talalelei. E iai nisi ua te'ena ma lē talitonu i le "ola faavavau", ina ua manatu o ia ua malaia i le agasala. O le "ola faavavau", o le ola lena o le Atua ua tino mai ia Iesu Keriso. Le ola ua tu'uina mai ma le mautinoa mo le 'au faatuatua, e saofagā ai i le Malo o le Atua ma le "ola faavavau" ua tapenaina. Ia salamō mai i faaletonu ma leaga uma lava, ma liliu i le malamalama o le Alii. Auā o le "ola faavavau", e le toe iai se oti, ma'i, filii ma le ti'apolo, le toe iai se agasala. O le alofa faamaoni lena o le Atua, na ia aumaia ai Iesu i le lalolagi. O lona finagalo foi lena mo le tagata, ia alofa atu i se ua leiloa i le pogisa, ma se o mana'omia le fesoasoani.

### **GALUEGA FAATINO: TAULOTO**


Ia a'oa'oina leni mau mo le fanau, fa'aaogaina ai le fuaiupu e 16.

*"Auā ua faapea lava ona alofa mai o le Atua i le lalolagi, ua ia aumai ai lona Atalii e to'atasi, ina ia le fano se tasi e faatuatua ia te ia, a ia maua le ola faavavau"*

### **A'OA'OGA**

1. Ia alofa atu i le Atua ma lou loto atoa.
2. Ia e alofa atu i le isi tagata, pei ona alofa mai o Iesu.
3. Ua na o Iesu tatou te maua ai le "ola faavavau"

**PESE:** Alofa Iesu iai tatou uma!



\*\*\*\*\*MANUIA LE SAPATI\*\*\*\*\*



**ASO SA: APERILA 26, 2026**

**MATAUPU FAAMANATU O APERILA:**

Momoli atu le faamalo ma le agaga faafetai i lau susuga mo galuega mae’ae’a o lenei masina. Ae iai lava le manatu vaivai, o le a taoto atu pea i lau susuga faiga o mataupu faamanatu poo su’esu’ega a fanau i faai’uga o masina ta’itasi. E fua lava i lau silasila se fuafuaga talafeagai mo lau vasega. O lena foi o loo iai galuena faatino o masina ua tuana’i, e toe faamanatu pe tapena iai sau lesona mo lenei aso. Mo le naunauta’iga, ia maua se ‘ai mo fanau lenei aso. Manuia tele lau susuga, manuia faiva ma tiute a feagai ai.

**ASO SA: ME 03, 2026**

**MATAUPU 11: O LE ALOFA FA'A-TINĀ ( IOKAPETA MA MOSE)**

**TUSI FAITAU:** Esoto 2: 1-6

**SINI:** Ia malamalama le fanau i le alofa o Iokapeta, na fa'asaoina ai Mose i lona fanau mai.

**FESOASOANI MO FAIAOGA**

Ua aulia manuia lenei masina fou i le alofa tausī o lo tatou Alii. Faamalo le galulue, malo foi le onosa'i. Masina atoa lenei e fia fa'ataua ai le "alofa fa'a-tinā" i nisi o faamaumauga a le Tusi Paia. Ua malamalama ma iloa e le tele o fanau Mose ma lona tāina o le papa. Peitai, e le faigofie tulaga faigata na iai lea vaitau. A o le alofa o Iokapeta i lana tama, na ia tapenaina ai le lavea'i mo Mose.

**FESOASOANI MO LE MATAUPU**

A o faapologaina Isaraelu i Aikupito, e lei avea lea tulaga e faaitiitia ai le tupu olaola o le nuu. Na alofagia lava e le Atua ma fa'ato'ateleina. Ua avea lea ma ala ua ita tele ai le tupu o Farao. Lea na ia faapea ane ai i fafine fa'atosaga o Isaraelu, afai e toe fanau se fafine Eperu o se teine, ia faasaoina. Ae a fanau mai o se tama, ia fasiotia ma lafo i le vaitafe. Ua faalogo Iokapeta i le faatonuga a Farao, ona fefe ai lea o ia. Ua fanau Iokapeta, ona ia nanāina lea i le tama mo le 3 masina. Ua faasolo matua le pepe ma ua le mafai ona toe fa'alafi. Ua tonu ai lona manatu e lalaga le ato kome, e tuu iai le tama ma tuu i le vao utuutu i le auvai o le vaitafe. Ona alu ifo lea o le afafine o Farao ma lana galu teine e taele i le vaitafe, o loo upeupepa ai le ato kome i le auvai. Ua ia tatalaina le ato, ua iloa ai le tama o loo i totonu, ona alofa lea iai o le afafine o Farao. Ma ua ia faaigoaina le tama ia Mose, auā na toina a'e o ia nai le vai. Le alofa fa'a-tinā o Iokapeta, na ia saili ma tapena se lavea'i mo lana tama. Le alofa foi lena sa lagona e le afafine o Farao, na ia toina ai Mose ma aveese mai i faigata. Ua tupu ma ola manuia Mose, ma ia ta'ita'i manuia ai Isaraelu i le sa'olotoga mai le nofo pologa i Aikupito.

**GALUEGA FAATINO: TUSIGA ATA**


Manaia ae saunia e lau susuga le faiaoga ni pepa ma ni peni e tufa i le vasega, e faatinoina le latou tusiga ata. Tusi le ata o le ato (pei o le ata ua tuuina atu i le tusi), ina ia iloa ma malamalama le fanau, o le ato kome fa'asaoina ai Mose. O le alofa na tapenaina e Iokapeta.

**A'OA'OGA**

1. O le alofa o le Atua, e ta'ita'ieseina ai tatou mai faigata.
2. O le alofa naunau foi o le tinā, ia ola manuia lana tama/fanau.

\*\*\* Ma nisi a'oa'oga te finagalo ai.

**PESE:** Le Alofa o le Atua, pei o se li'o tele / God's love is like a Circle, a circle big and round.



\*\*\*\*\*MANUIA LE ASO SA\*\*\*\*\*



**ASO SA: ME 10, 2026**

**MATAUPU 12: O LE ALOFA FA’A-TINĀ ( HANA MA SAMUELU)**

**TUSI FAITAU:** 1 Samuēlu 1: 24-28

**SINI:** Ia a’oa’oina le fanau i le taua o le ola tatalo. O le tatalo na manuia ai le faamoemoe na momo’o iai le loto o Hana.

**FESOASOANI MO FAIAOGA**

Faatalofā atu i le alofa o le Alii, faafetai mo lau auauunaga mo le ekalesia. O loo fa’auauina lenei masina atoa tala o tinā o le Tusi Paia. Lenei lesona, ua lauiloa Hana ma ona tala’aga ona sa amusia e lona to’alua, ona e pā e lē fanau. O le pule foi a le Alii na afua ona le fanau o ia. Ae le’i avea na tulaga ma ala na fa’avaivai ai Hana e tatalo i le Atua.

**FESOASOANI MO LE MATAUPU**

E iai le tasi tagata o Elekana le igoa, sa ia te ia ana avā e to’alu, o Penina ma Hana. O Penina e iai lana fanau, a o Hana e leai. O le mea lea na le mapu ai Hana e ulufale i le falo o le Alii e tatalo. Ua fai ma masani a Hana le tatalo i le Atua mo sana tama. Peita’i, ua avea le alu o Hana i le fale o le Alii e tatalo ma mea ua tauemu ma tau faalili ai Elekana ia te ia ona e lē fanau. Ua tagi Hana ona ua tiga tele lona loto. Ua tatalo foi o ia i lona loto ua na ona memu ae le tautala. Lea na ole atu ai Hana i le Alii “e foa’i mai i lau auauuna fafine se tama tane, ona ou foa’i atu lea o ia i le Alii i aso uma o lona ola”. Ua to Hana ma fanaua e ia o se tama tane, ua ia fa’aigoa ia te ia o Samuelu, auā ua fa’afogaina e le Atua lana tatalo. Na tumau Hana i lana tautoga na faia i le Alii. Na te’a loa Samuelu ma le susu, ave loa i le fale o le Alii, ia Eli le faitaulaga. Ua matua Samuelu, ma ua avea o ia o se tasi o perofeta ta’uta’ua o Isaraelu. O le tatalo foi lena ma le naunauta’iga a soo se tinā kerisiano, o le ave o fanau i le falesa ma le a’oga aso Sa,, ia a’oa’oina i tala o le Atua ma ia iloa tatalo.

**GALUEGA FAATINO: TATALO PU'UPU'U / SHORT PRAYER**

Ona o le aso Sa lenei o Tinā, manaia ae a'o ia maua lenei tatalo pu'upu'u mo le vasega atoa.

*“Dear God, thank you for my Mother, may you bless Her forever more.....amen”*

**A'OA'OGA**

1. Aua nei galo ona tatalo faafetai i le Atua i aso uma.
2. A oo mai faigata, tatalo i le Atua e fesoasoani mai.
3. E tali mai le Atua i lau tatalo.
4. O le tatalo a Hana na manuia ai Samuelu.

**PESE: FAITAU LE TUSI PAIA MA TATALO I ASO UMA**



\*\*\*\*\*MANUIA LE ASO SA O TINĀ\*\*\*\*\*

**ASO SA: ME 17, 2026**

**MATAUPU 13: O ELIA MA LE FAFINE SAREFATA**

**TUSI FAITAU:** 1 Tupu 17: 8-16

**SINI:** Ia malamalama le vasega, sa agalelei le fafine Sarefata ia Elia

### **FESOASOANI MO FAIAOGA**

Soifua manuia i le agalelei o le Alii, faafetai mo galuega fa'aauau mo le fanau. E tulituliloaina pea le autu o lenei masina, o le alofa fa'a-tinā. O le agalelei o le fafine Sarefata, o le alofa o le tinā e lē lima mau ae ofoina atu ma le loto malie.

### **FESOASOANI MO LE MATAUPU**

Na fetalai le Atua i lana perofeta o Elia, e alu i le nuu o Sarefata, o lo o i ai le fafine ua oti lana tane, na te tausi ia te ia. Ona tulai lea o Elia ma alu i Sarefata. Ua iloa atu e Elia le tasi fafine o loo fai fafie, ona ia valaau atu lea i ai, sei aumai se ipu vai sei inu ai. Ua sau le fafine ma le ipu vai, ae ua ia toe fai atu i ai, sei aumai se fasi areto sei ona 'ai ai. A ua tali ane le fafine, "O lo o soifua le Alii, e leai se potoi areto ia te au" Ua faapea ane le fafine ia Elia, ua toe lava o sina fasi falaoa ma sina suauu itiiti i le fagu o totoe. Sa ia sau e fai atu ni fafie e fai ai se la meaa ma si ana tama, ona feoti ai lea, aua ua leai se mea e 'ai o totoe. Ua fai atu le perofeta o Elia i le fafine, "Aua e te fefe! Alu e fai le mea lea ua ou fai atu e fai. Aumai muamau ia te au se potoi areto itiiti, ona faatoa lua aai ai lea ma laua tama. Ua fetalai mai le Alii le Atua o Issarelu, e le faaitiitia le suauu i le fagu, ma le falaoa i le kate, seia o'o i le aso e foaiina mai ai e le Alii le ua i le laueelele. Ona alu lea o le fafine, ua ia usitai ma le loto talitonu ma le faatuatua i le mea sa fai atu ai Elia ia te ia. Ua moni lava upu a Elia, aua sa tele aso na nofo ai Elia i le fale o lenei fafine, ma sa le i uma le falaoa i le kate, e le i faaitiitia foi le suauu i le fagu.

### **GALUEGA FAATINO: VALIVALIGA ATA**

Faamolemole fai ni kopi o ata ua tuuina atu i lalo, ma ni peni vali e galulue ai le fanau.

### **A'OA'OGA**

1. E faamaoni le Atua i ana folafolaga.
2. Ia tatou alolofa ma agalelei i tagata uma.
3. E faamanuia le Atua i tagata agalelei, ma le tamaitiiti amio lelei.

**PESE:** LOVE IS SOMETHING THAT YOU GIVE IT AWAY



\*\*\*\*\*

**ASO SA: ME 24, 2026**

**MATAUPU 14: TINĀ O LE PENETEKOSO**

**TUSI FAITAU:** Galuega 1: 12-14; Galuega 2: 1-4

**SINI:** Ia malamalama le fanau, sa iai Maria le tinā o Iesu faatasi ma le ‘au soo i le aso Penetekoso.

**FESOASOANI MO FAIAOGA**

Faatalofā ma avatu le agaga faafetai ona o galuega faatino a le ekalesia aoao. O le aso Penetekoso lenei poo le aso fanau a le Ekalesia Kerisiano o le lalolagi. Fetalai Iesu i lana ‘au so’o ina o le a afio i le lagi, o le a maua e outou le mana pe a Afio ifo le Agaga Paia i luga ia te outou. E fai foi outou ma molimau ia te a’u i Ierusalemā, Iutaia, Samaria, e o’o i tulu’iga uma o le lalolagi.

**FESOASOANI MO LE MATAUPU**

O le mataupu leni ituaso, ua ave le fa'amamafa e fa'ataua ai le galuega faatino a le tinā. Ua toe foi le 'au soo i Ierusalem e faatalitali le Agaga Paia pei ona fetalai Iesu. Ae fia tuliloa le auai o Maria faatasi ma le 'au so'o i le afeafe aupitoaluga o le fale. E le'i nofoa'i Maria, ae sa punou ma finafinau i le tatalo ma faatalitali le Afio mai o le Agaga Paia. Ua manino le mea na tupu i lea aso, i le Afio ifo o le Agaga ma ua fa'aeseeseina ai gagana. A o le autu atoa o le galuega a Maria. Mai lava i le fanau mai o Iesu, le misiona ma le galuega tala'i a Iesu, o le maliu ma le toe tu, na i ai lava o ia. Sa faufautua ma lagolago, nofo tatalo ma tapua'i, ma avea ma se tasi o molimau i le Talalelei. Ae le gata sa ia molimau i le fanau mai o le Keriso, a o lea foi ua ia molimau i le fanau o le ulua'i Lotu/Ekalesia. O tiute na a le tinā alofa, e fautua, lagolago, tausi, ma tatalo ina ia manuia lana fanau. O le ata foi lena o le alofa o lo tatou Atua, e fau ola, faatupu ola, ma tausi ola.

### **GALUEGA FAATINO: PESE**

Ona o le aso sa Penetekoso leni poo le aso fanau a le ekalesia, manai ae usu e le fanau le pese Happy Birthday. *Happy birthday to you, happy birthday to you, happy birthday dear Church, happy birthday to you! Manuia lou aso fanau, manuia lou aso fanau, manuia lou aso fanau Ekalesia, manuia lou aso fanau!*

### **A'OA'OGA**

1. O le Agaga Paia o lo tatou fesoasoani sili.
2. Ia avea i tatou ma molimau a Iesu Keriso.

\*\*\* Faatasi ai ma nisi a'oa'oga te finagalo ai.

**PESE:** I le Lalolagi atoa, o loo galue le Agaga o le Atua.



**ASO SA: ME 31, 2026**

**MATAUPU FAAMANATU O ME**

Suafa o Iesu Keriso le Matai o le galuega, e faatalofa atu ai i lau susuga. Le agaga faafetai tele, ona o lea ua taunuu mai foi i le aso Sa mulimuli o lenei masina. Malo le faamalosi i le ola ofoina atu mo le ekalesia ma ana feau. E tumau pea se lagona, o le a taoto atu lava i lau susuga se fuafuaga mo mataupu faamanatu a le fanau. Tapena lava e oe se faatinoga e talafeagai mo nai fanau. A o le naunauta'iga lava a lenei ofisa, ia fo'i le fanau ma se oso o le Talalelei. Faamanuia le Atua i lau susuga, manuia galuega a feagai ai.

\*\*\*\*\*

**ASO SA: IUNI 07, 2026**

**MATAUPU 15: O LE VAELUAINA O LE SAMI**

**TUSI FAITAU:** Esoto 14: 15-22

**SINI:** Ia malamalama le fanau o Mose na tauala mai ai le mana lavea'i o le Atua, i le vaeluaina o le sami.

**FESOASOANI MO FAIAOGA**

Faafetai i le alofa o le Atua ua tatou aulia manuia mai lenei masina fou. Malo le onosa'i i mataupu o le fanau. O le masina atoa lenei e autu ia Mose lesona mo le vasega. E amata i le aveeseina mai i le nofo pologa i Aikupito, ma fa'asaoina i le vavega a le Atua ma le vaeluaina o le sami.

**FESOASOANI MO LE MATAUPU**

Fetalai le Atua ia Mose e alu e aveese mai lona nuu o loo faapologaina i Aikupito i le pule sauā o Farao. E lē faigofie le galuega na feagai ma Mose, ae na fa'ataunuuina lava i le fesoasoani mai o le Atua. Ua o ē ese le nuu o le Atua ma Aikupito, ae na tuliloaina lava e Farao ma lana 'au tau. Na fa'atumulia tagata o le nuu i le fefe, ona o loo si'omia o latou tua e Aikupito ae punitia o latou luma e le sami. Fai atu Mose i le nuu, aua tou te fefefe, o le a tau le Alii mo outou, ae faalologo outou. Ua faafofoga le Atua i le alaga ma le tatalo a Mose ma ia fetalai ane ai, fai atu i le nuu e o atu pea i luma. A o oe Mose, ia sii i luga lou to'oto'o ma fa'aloaloa lou lima i luga o le sami ma vaeluaina ai, ae o atu ai le fanauga Isaraelu. Ua sopo le nuu ma taunuu manuia i le isi itu vai, a o tuliloa pea i latou e Farao ma ana 'au. Ua toe sii i luga le to'oto'o a Mose ma faaloaloa lona lima, ona ufitia ai lea o Farao e le sami, ma fa'aumatia Aikupito uma na tuliloa ia Isaraelu.

**GALUEGA FAATINO: VALIVALIGA ATA**

Fai ni kopi o le ata ua tuuina i lalo, faatasi ai ma ni peni vali e galulue ai le fanau faamolemole.



**A’OA’OGA**

1. E leai se mea e faigata i le Alii.
  2. E fesoasoani mai le Atua pe a tatou alaga ma tatalo ia te ia.
- \*\*\* Ma nisi a’oa’oga te finagalo ai.

**PESE:** My God is so big, so strong and so mighty there’s nothing my God cannot do!

\*\*\*\*\***MANUIA LE ASO SA**\*\*\*\*\*



**ASO SA: IUNI 14, 2026**

**MATAUPU 16: O TULAFONO A LE ATUA (VAEGA 1)**

**TUSI FAITAU:** Esoto 20: 3-7

**SINI:** Ia a’oa’oina ma malamalama fanau i tulafono a le Alii (Ten Commandments).

**FESOASOANI MO FAIAOGA**

Faatalofa atu i lau susuga, malo le ‘aao gasolosolo, malo le faamalolosi i galuega faatino a le ekalesia. Ua iai se manatu vaivai o le a fa’aaogaina tulafono e sefulu e tapena ai se lesona mo fanau. Vaega muamua lenei o le a a’oa’oina ai tulafono muamua (1) e faagata le tolu (3).

**FESOASOANI MO LE MATAUPU**

Ua taunuu le malaga a Isaraelu i le vao o Sinai ona latou tolauapi lea ma malolo lata ane i le mauga. Valaau le Alii ia Mose mai le mauga, fai atu i le fanauga o Isaraelu, ua latou va’ava’ai ma molimauina mea ofoofogia na ia faia i Aikupito. Le alofa lavea’i o le Atua e ala i lana feagaiga, “e fai oe Isaraelu mo’u nuu, fai a’u mou Atua. Le finagalo o le Alii mo le nuu ia faalogo ma tauiusi i lana feagaiga. Lea na ia valaau ai ia Mose e alu a’e i le tumutumu o le mauga o Sinai, ma tuuina ifo ai tulafono ua tusia i papa ma’a, e fai ma ta’iala ia tausii ma

mulimulita'i ai Isaraelu. O le finagalo a le Atua, ia ola fa'apaiaina tagata o le nuu, ma faailoa lona mamalu i le lalolagi uma. O le finagalo lava lea mo fanau kerisiano uma, ia ola matata'u ma ola faapaiaina i tatou uma mo le Alii.


**GALUEGA FAATINO:** Tauloto Tulafono 1, 2, 3.

1. *Aua nei fai mo oe ni atua ese i o'u luma.*
2. *Aua e te fai mo oe se tupua ua ta.*
3. *Aua e te ta'u fua le suafa o le Alii lou Atua.*

**A'OA'OGA**

1. Ia tatou tausi i poloa'iga ma tulafono a lo tatou Atua.
2. Ola faapaiaina, ma le amioa lelei, e fiafia ai Iesu.
3. Faalogo ma usita'i i matua, e manuia ai.

**PESE:** FAALOGO MA USITAI E LEAI SE ISI ALA!



**ASO SA: IUNI 21, 2026**

**MATAUPU 17: O TULAFONO A LE ATUA (VAEGA 2)**

**TUSI FAITAU:** Esoto 20: 8-13

**SINI:** Ia a’oa’oina ma malamalama fanau i tulafono 4, 5, 6.

### **FESOASOANI MO FAIAOGA**

Malo le soifua maua i le alofa o le Alii, malo foi le galulue i tofiga ua valaauina ai. O le vaega 2 leni o le fa’aaauina o tulafono a lo tatou Atua. E iai le manatu, e le afaina lava se isi auala ua e finagalo ai e tapena ai lau lesona. Ae naunau lava ia faagasolo pea le a’oa’oina o tulafono, ia fa’amasani le fanau ma taofi ai.

### **FESOASOANI MO LE MATAUPU**

Talitonu ua iloa ma malamalama lau susuga i le mafuaaga na finagalo le Atua e faataoto ma faavae lana tulafono. O le faamoemoe ua fai pea ma faamanatu mo Isaraelu, peiona fetalai ai le Atua. “O a’u o le Alii lou Atua, o lē na aumaia oe nai le nuu o Aikupito, o le mea sa nofo pologa ai”. O se faamanatu foi lea mo i tatou ua ta’u kerisiano ina, o le ta’iala lava lea mo i tatou uma. O le mataupu leni taeao, o tulafono nei e tolu (3) ua va’aia le solisoli malie i lalo e tagata kerisiano leni vaitau. A o lo tatou galuega fa’aolaola lea ia a’oa’o ma tau logologo pea fanau , ia malamalama ma iloa le finagalo a le Alii e ala i ana tulafono.

### **GALUEGA FAATINO: TAULOTO TULAFONO**

1. Tulafono 4 – Ia manatua le aso sapatu ia faapaiaina.
2. Tulafono 5 – Ia e ava i lou tamā ma lou tinā, ina ia faalevaleva ai ou aso i le nuu o le a foaiina mai e le Alii lou Atua ia te oe.
3. Tulafono 6 – Aua e te fasioti tagata.

### **A’OA’OGA**

1. Ia tatou tausii i poloa’iga ma tulafono a lo tatou Atua.
2. Ola faapaiaina, ma le amioa lelei, e fiafia ai Iesu.
3. Faalogo ma usita’i i matua, e manuia ai.

**PESE:** Oute le faatali se i matua ona ou gaua’i lea.

\*\*\*\*\***MANUIA LE ASO SA**\*\*\*\*\*



**ASO SA: IUNI 28, 2026**

**MATAUPU FAAMANATU O IUNI**

O le Viiga ma le faafetai e foi ma tumau i le Atua, ona o lea ua taunuu manuia mai i le toe aso Sa o galuega faatino o le afa muamua o lenei tausaga. Malo le lava papale, malo le tauata'i, faafetai le onosa'i i le ola ofoina atu mo le Atua ma ana feau, e ala i le ekalesia ma lana a'oga aso Sa. Ae tumau pea se lagona, o le taoto pea i lau susuga se fuafuaga mo mataupu faamanatu a le fanau. E le afaina foi ae fa'aauau pea tulafono e fa (4) o loo totoe. A o le tulaga lena e pule ai lava lau susuga. Ae manuia tele lau susuga, ia maua pea lou malosi e toe fa'aauauina ai lau tautua, pe a sopo le ola i le afa mulimuli mo lenei tausaga.

\*\*\*\*\*

**MANUIA LE SAPATI**